

KOMISAUN EKONOMIA NO DEZENVOLVIMENTU

RELATORIU VIZITA FISKALIZASAUN KOMISAUN D IHA POSTU ADMINISTRATIVU ATAURO

I. INTRODUSAUN

1.1. Enkuadramentu Legal

Komisaun Ekonomia no Dezenvolvimentu, Parlamentu Nasional hala'ó vizita fiskalizasaun bazeia ba artº. 92º, artº. 95º, n.º 3 alínea e), kombinadu ho artº. 145º n.º 3) husi Konstituisaun RDTL, no mos bazeia ba artº. 35º alínea c), kominadu ho artº. 79º alínea f) husi Rejimentu Parlamentu Nasional.

Vizita ne'é bazeia ba planu atividade ba tinan 2019 ne'ébe koalia kona ba vizita lokal no mos bazeia ba deliberausaun ne'ébe komisaun foti iha loron 13 fulan novembru 2019 no iha loron ne'é kedas komisaun hato'ó pedidu autorizaun ba Prezidente Parlamentu Nasional no tuir mai hetan despachu iha loron 14 fulan novembru 2019.

Haktuir ba despachu refere, iha loron 10-14 dezembru 2019, komisaun realiza vizita fiskalizasaun Postu Administrativu Atauro ho intensaun atu hare no rona diretamente rezultadu husi implementasaun projetu sira iha reijaun refere.

1.2. Área Fiskalizasaun

Delegasaun halo fiskalizasaun ba área ne'ébe mak kabe ba kompetensia Komisaun Ekonomia no Dezenvolvimentu, hanesan: MAP, SEFOPE, MTCI, Ambiente no Ko'operativa, maibe komisaun ba hare área sira ne'ébe identifika ona hanesan: Vizita Grupu Indústria Boneka iha suku Villa Maumeta, Vizita Grupu Indústria BIA-JOIAS iha suku Villa Maumeta no Vizita Be'é Matan Bitau.

1.3. Métodu Fiskalizasaun

Métodu ne'ébe komisaun uza iha fiskalizasaun ne'e mak liu husi diálogu ho lideransa lokal sira liu husi reuniaun. Depois reuniaun membru komisaun ba terenu hodi halo observasaun direta ba konstrusaun no mos koalia direta ho populasaun sira. Depois observasaun komisaun reuniaun hodi halo avaliasaun ba dadus ne'ébe iha molok aprova.

1. Enkontru

Delegasaun hasoru malu ho Administrador Postu Administrativu Atauro, xefe suku sira no diretores linhas ministeriais.

KOMISAUN EKONOMIA NO DEZENVOLVIMENTU

2. Observasaun direta

Hare projetu fiziku, koalia ho agrikultor sira no rona komunidade nia lamentasoens.

3. Análiza

Cross check dadus ne'ebé hetan husi vizita, liga ba ezekusaun orsamentu no dadus ne'ebé mai husi governu, hodi hatene kona ba efisiensia no efikasia ezekusaun orsamentu, atu hatene kona ba balansu entre despezas no beneficiariu sira, no atu sukat meta política kona ba retornu ekonómiku.

1.4. Objetivu Vizita

Objetivu husi vizita fiskalizasaun ne'e:

1. Atu hare efisiensia no efikasia iha ezekusaun orsamentu jeral estadu bazeia ba kumprimentu lei no kualidade obra;
2. Rejista no identifika problema ne'ebé iha, relasiona ho ezekusaun orsamentu (balansu ba beneficiariu sira no osan ne'ebé gasta);
3. Atu hare diretamente prosesu no progressu konstrusaun husi projetu no política implementasaun projetu.

1.5. Delegasaun

Delegasaun Komisaun D ne'ebé hola parte iha vizita fiskalizasaun ne'e kompostu husi deputadus, teknikus no motoristas hanesan tuir mai:

- | | | |
|---|-------------------|-----------------|
| 1. Deputada Virginia Ana Belo | (Prezidente) | Xefe Delegasaun |
| 2. Deputadu Ricardo Baptista | (Vice-Prezidente) | Membru |
| 3. Deputada Olinda Guterres | (Sekretaria) | Membru |
| 4. Deputadu José Virgílio F. Ferreira | | Membru |
| 5. Deputadu Antoninho Bianco | | Membru |
| 6. Deputadu António do Santos ''55'' | | Membru |
| 7. Deputadu Alexandrino C. da Cruz | | Membru |
| 8. Deputada Regina Freitas | | Membru |
| 9. Deputadu Mariano Assanami Sabino Lopes | | Membru |
| 10. Teknikus no Motoristas | | |

KOMISAUN EKONOMIA NO DEZENVOLVIMENTU

II. REZULTADU ENKONTRU

2.1. Enkontru ho autoridade lokal sira iha Postu Admnistrativu Atauro, Suku Villa Maumeta

Informasaun no preokupasaun ne'ebe hato'o husi autoridade lokal sira iha sorumutu ho komisaun D, iha loron 10 dezembru 2019, iha salaun Postu Administrativu Atauro hanesan tuir mai ne'e:

Administradór Postu Administrativu Atauro iha introdusaun haktuir katak ohin loron orgulho bo'ot simu ita nia bainaka especial sira mai husi Parlamentu Nasional, liu husi komisaun D ne'ebe trata ba asuntu ekonomia no desenvolvimentu mai iha Atauro. Atauro nudar ilha ida ne'ebe hetan tratamento especial iha konstituisaun RDTL. Koalia kona ba asuntu ekonomia no desenvolvimentu Atauro presiza hakotu izolamentu no tenki iha konektividade entre Dili ho Atauro hodi vizitante barak bele mai vizita Atauro. Hare husi parte turismu kontinua lao, tanba iha tinan hirak ikus ne'e, liu husi atividade turismu ne'ebe mak kontribui ona ba ekonomia komunidade sira nian, liu husi indústria kikoan sira hanesan homan, artejenatu, guest house no restorante sira komesa moris liu tan atrai vizitante sira. Iha indústria ne'ebe hanaran Boneka Atauro ne'ebe famosu iha rai laran no mos iha rai liur, tanba bainhira turista sira vizita Atauro, vizita mos fatin Boneka Atauro. Maibe durante ne'e difikuldade ne'ebe infrenta mak transporte marítima ne'ebe liga Dili no Atauro hanesan iha ro'o rua ne'ebe halo operasaun semana ida dala rua iha loron quinta-feira no loron sabado mak ro'o Nakroma no ro'o Susesu, maibe ro'o Nakroma bainhira ba halo hela manutensaun, hela deit ro'o Suseso ne'ebe mak halo operasaun semana ida dala ida iha loron sabado.

Difikuldade seluk hanesan estrada, eletrisidade no be'e mos (água potavel). Estrada iha parte villa sei nakonu hela ho rai rahun, liga ba suku hodi ba ba to'o iha aldeia sira kondisaun grave liu ne'ebe mak difikulta tebes komunidade sira atu lori produtus hodi asesu ba merkadu. Eletrisidade, iha Postu Administrativu Atauro iha suku rua mak seidauk asesu total hanesan suku Macadade no suku Maquili. Iha suku Maumeta villa komunidade hela deit 1% mak ladauk asesu ba eletrisidade, tanba hela dok oitoan husi villa. Suku Beloi iha aldeia hat no aldeia tolu mak seidauk asesu ba eletrisidade tanba dok, nune'e mos iha suku Biqueli iha aldeia hát no aldeia rua mak seidauk asesu ba eletrisidade. Água potavel mos sai nudar probelema bo'ot ne'ebe mak komunidade maioria iha postu administrativu Atauro infrenta iha tempu bailoron naruk ne'ebe mak halo komunidade sira lao ain ho distânsia ne'ebe dok hodi ba kuru be'e no iha tempu udan komunidade barak mak sei utiliza udan ben ba konsumu lor-loron.

KOMISAUN EKONOMIA NO DEZENVOLVIMENTU

Administradór Postu Administrativu Atauro haktuir liu tan katak ho problema sira ne'ebe hanesan mensiona ne'e tuir lolos resolve ona buat balun iha tinan lima ne'e, tanba Atauro ho Oe-cusse pakote ida deit tama iha ZEESM (Zona Economia Especial Social Mercado), maibe durante implementasaun projetu ida ne'e Oe-cusse mak hetan benefisiu liu no Atauro hela deit ho naran nein benefisiu ba buat rumu. Situasaun ida ne'e halo povu Atauro sai dúvida, tanba ne'e povu Atauro rasik husu atu kria estatutu propriu atu nune'e ba futuru bele iha dezenvolvimentu ne'ebe hanesan iha parte hotu-hotu.

Hafoin tuir mai, Prezidente Komisaun D, deputada Virgínia Ana Belo, nudar xefe delegasaun haktuir katak objetivu vizita fiskálizasaun iha Postu Administrativu Atauro hakarak rona no hare problema ho preokupasaun sira ne'ebe povu Atauro infrenta, liu-liu hanesan saida mak administradór fó sai ona katak tenki hakotu ona Atauro sai husi izolamentu, tanba desde uku nan to'o agora Atauro sei halerik hela nafatin, liu-liu informasaun sira ne'ebe hato'o hanesan eletrisidade ne'ebe existe desde okupasaun Indonezia nian mak nafatin to'o agora, estrada ne'ebe kondisaun grave liu hanesan iha villa laran kuaze ateru hotu deit hanesan ne'e para mais kompara ho suku no aldeia sira, nune'e mos águia potavel. Tan ne'e mak ba oin buka nafatin hodi hatur estatutu propriu atu nune'e Atauro bele hetan tratamento espesial tuir definisaun ne'ebe difini ona iha konstituisaun RDTL, tanba ne'e komisaun D hakarak rona husi ita bo'ot sira, liu-liu autoridade lokal sira ne'ebe mak besik liu ba povu, ho nune'e sai hanesan referensia ida ba komisaun atu bele hatutan ba governu iha diskusaun OGE 2020 bele resolve ona buat balun maske la resolve hotu, liu-liu oinsa mak Atauro bele hetan estatutu espesial. Iha orsamentu ne'ebe destinadu ba Atauro desde 2015 porvollta de \$25 milhoes ne'ebe tama hela iha ZEESM, no tanba saida mak la ezekuta, maibe ida ne'e komisaun sei koalia ho governu sentral no Prezidente Autoridade foun RAEOA e ZEESM atu nune'e bele uza osan ida ne'e hodi bele resolve ona buat balun iha Atauro.

Hafoin tuir mai, tempu ba iha autoridade lokal sira, liu-liu xefe suku sira ne'ebe marka presenza iha sorumtu ne'e hato'o problema sira ne'ebe mak durante ne'e povu infrenta em jeral no espesifiku iha kada suku sira. Autoridade lokal sira mak hanesan tuir mai:

- Xefe suku villa Maumeta, iha nia intervensaun ne'ebe koloka, liu-liu liga ba rendimentu família nian ne'ebe mak iha família balun loron ida bele hetan centavos \$0,80 - \$1.00 dolar. Rendimentu ne'e hetan husi produtu ne'ebe fa'an no família balun la iha liu. Rendimentu sira ne'e maioria depende ba iha turista rai laran no mos rai liur ne'ebe sirkula ba mai Atauro, tanba ne'e mak

KOMISAUN EKONOMIA NO DEZENVOLVIMENTU

sujere tenki iha transporte maritima ida ne'ebe destinadu permanente hodi halo operasaun Dili-Atauro-Dili, tanba ho nune'e mak bele kontribui ba ekonomia família nian. Kestaun seluk, liga ba peskas, tanba povu maioria moris depende ba iha atividade peskas, maibe estabelese ona programa tara bandu desde 2016 ba iha suku sira ne'ebe mak bandu labele halo peska tanba ikan iha área tasi Atauro nian menus no parte seluk atu konserva no proteje ahu ruin sira no riku soin seluk tan ne'ebe mak hetan estragus husi atividade peskas, se hanesan ne'e povu peskador Atauro atu ba peska iha ne'ebe. Kona ba turismu sujere sebele estabelece sentru exhibisaun ida ba produtu lokal kada suku iha Atauro, tanba produtu lokal kada suku iha maibe la iha fatin ruma ne'ebe mak bele akomoda hotu produtu sira iha fatin ida deit mak bele fa'an ba vizitante sira. Setor agrikultura husu atu kria fatin (lahan) ida espesifiku ba ai saida deit mak merese moris iha Atauro hanesan nu'u, marungi no seluk tan.

- Xefe suku Beloi, iha nia intervensaun ne'ebe foka ba iha taxa ne'ebe kobre husi setor turismu, liu-liu taxa ne'ebe hetan husi tuirsta sira ne'ebe vizita Atauro, tanba tuir sira nia hare katak durante ne'e turista barak mak vizita Atauro no sira nia parte la iha informasaun ne'ebe klaru kona ba taxa hira mak hetan no husi taxa hirak ne'e sa deszenvolvimentu ba iha setor turismu mak akontese ona iha Atauro, maibe durante ne'e nein iha dezenvolvimentu ruma mak akontese.
- Xefe suku Biqueli, iha nia intervensaun ne'ebe koloka, liu-liu kona ba estatutu Atauro ne'ebe liga ho Konstituisaun RDTL artigo 5, numeru 3 ne'ebe haktuir katak Oe-cusse no Atauro hetan tratamentu administrativu no ekonomiku espesial, maibe iha fali artigo 71, numeru 2 hateten katak Oe-cusse Ambeno mak hala'o kna'ar tuir politika administrativa ho rejime ekonomiku espesial no iha numeru 3 mak hatete Atauro sei iha estatutu ekonomiku rasik. Maibe saida mak akontese durante tinan lima nia laran implementasaun projetu ZEESM Oe-cusse mak benefisia bo'ot no Atauro nein hetan benefísio ruma.
- Xefe suku Macadade, iha nia intervensaun ne'ebe koloka, liu-liu kona ba promesa ne'ebe governante anterior balun ba promete hela iha tinan rua liu ba atu estabelese Eskola Ensino Básico Central (EBC) iha suku Macadade maibe ikus mai estabelese fali iha suku villa Maumeta halo komunidade suku Macadade lamenta tebes no ninia impaktu mak estudante sira husi suku Macadade lao ain ho distansia ne'ebe dok hodi ba tuir prosessu aprendijazem iha suku villa Maumeta.

KOMISAUN EKONOMIA NO DEZENVOLVIMENTU

Hafoin termina tiha sorumutu iha loron dahuluk, tuir programa ne'ebe iha, loron tuir mai komisaun sei kontinua vizita ba to'o iha suku sira, iha Postu Administrativu Atauro hodi bele hare no rona diretamente preokupasaun no problema sira ne'ebe mak povu sira hasoru iha sira nia moris lor-loron, liu-liu problema no preokupasaun ne'ebe mak kabe ba iha área kompetensia komisaun D nian.



Enkontru ho autoridade lokal no diresaun linha ministeriais sira, iha salaun administraun postu administrativu Atauro

2.2. Enkontru ho autoridade lokal no komunidade, iha suku Macadade

Problema no preokupasaun ne'ebe hato'o husi autoridade lokal no komunidade sira iha sorumutu ho komisaun D, iha loron 11 dezembru 2019, iha sede suku Macadade hanesan tuir mai ne'e:

- Xefe suku Macadade, iha intrudusaun haktuir katak situasaun no kondisaun jeral iha suku Macadade mak hanesan estrada em jeral husi Macadade ba to'o postu villa grave liu no laiha transporte publiku ruma mak halo movimentu iha ne'e, difikulta komunidade sira atu lori sira nia produtu ba postu villa hodi ba Dili lao ain ho distansia ne'ebe dok tebes.

Suku Macadade kompostu husi aldeia hat: hanesan aldeia Anartuto, aldeia Ilitimur, aldeia Biti no aldeia Berau. Aldeia Ilitimur mak hasoru problema kona ba be'e mos iha tempu bailoron ne'ebe iha deit be'e matan ida naran Bitau ne'ebe nia debit menus liu. Bainhira komunidade sira ba kuru lori tempu no toba deit iha be'e matan hein hodi bele kuru. Be'e mos, tan iha suku Macadade iha be'e matan bo'ot ida iha liu kraik, maibe iha tempu liu ba iha apoiu husi empresa ida hodi dada

KOMISAUN EKONOMIA NO DEZENVOLVIMENTU

be’e ne’e hodi fornece ba iha suku Maquili, Beloi no Biqueli, maibe suku Macadade la iha. Eletrisidade seidauk asesu total ba iha suku Macadade.

Kona ba Ensino Básico Central (EBC) ne’ebé mak husu atu estabelese sentru ida iha suku Macadade, tanba distansia ba postu villa dok no bele akomoda hotu estudante husi aldeia balun husi suku Beloi nian ne’ebé besik ho suku Macadade.

- Xefe aldeia Anartuto, fó sai katak total populaun iha aldeia ne’ebé hamutuk 839, kompostu husi mane 425 no feto 414 ne’ebé barak liu no balun hela dok tebes difisil atu kontrola, tanba ne’ebé husu atu kria tan aldeia ida hodi nune’ebé fasil kontrola no atende ho lalais. Dados desastre naturais ne’ebé apresenta desde 2016 to’o 2019 laiha resposta ruma.
- Xefe aldeia Ilitimur, fó sai katak total populaun iha aldeia ne’ebé hamutuk 444, mane 235 no feto 209. Problema ne’ebé infrenta mak be’ebé mos, tan ne’ebé husu apoiu tenki uda ben ruma, no mos husu apoiu solar panel tanba seidauk asesu ba eletrisidade.
- Xefe aldeia Biti, fó sai kona ba problema esensias ne’ebé infrenta mak estrada, eletrisidade no be’ebé mos.
- Xefe aldeia Berau, fó sai kona ba problema ne’ebé infrenta hanesan estrada husi suku ba aldeia seidauk iha, laiha eletrisidade, laiha rede komunikasaun.

Alende problema no preokupasaun ne’ebé koloka husi autoridade lokal sira, iha mos preokupasaun balun ne’ebé mak hato’o husi komunidade sira hanesan tuir mai ne’ebé:

- Senhora Filomena husi aldeia Anartuto hato’o nia preokupasaun ne’ebé koloka relasiona ba eletrisidade ne’ebé to’o agora seidauk iha no husu apoiu solar panel ruma hodi bele fó naroman dadaun ona, liu-liu ba estudante sira hodi bele estuda ho diak liu tan. Preokupasaun ida fali kona ba bolsa de māe, ne’ebé mak aman ka inan funzionariu oan labele hetan.

KOMISAUN EKONOMIA NO DEZENVOLVIMENTU

- Senhor Leo husi aldeia Ilitmur, hato'o preokupasaun balun ne'ebe mak akontese liu ona kona ba atusaun balun husi autoridade sira hodi sobu komunidade nia quintal, inklui ai horis sira hodi halo dezenvolvimentu, maibe laiha indeminizasaun no husu karik ba oin atu halo dezenvolvimentu rumu tenki kolabora ho komunidade sira. Preokupasaun ida fali kona ba asuntu tara bandu iha tasi no foho, maibe realidade ai iha foho lolon sira tesi mohu hotu, no tara bandu iha tasi tenki hare didiak tanba komunidade Atauro maioria moris ho atividade peska. Preokupasaun seluk fali kona ba transporte marítima hanesan ro'o Nakroma nudar ro'o estadu nian, maibe estudante sira selu \$5.00 dolar ba-mai Atauro-Dili-Atauro. Ikus liu, kona ba asuntu sosial liga ho ro'o funeral ne'ebe destaka iha Atauro seidauk to'o tinan kondisaun at tiha ona no kuandu tula família rumu mate husi Dili ba Atauro tula iha ro'o privadu maibe selu tan.



Enkontru ho autoridade lokal ho komunidade sira iha sede suku Macadade

2.3. Enkontru ho autoridade lokal no komunidade sira iha suku Maquili

Problema no preokupasaun ne'ebe hato'o husi autoridade lokal no komunidade sira iha sorumutu ho komisaun D, iha loron 12 dezembru 2019, iha sede suku Maquili hanesan tuir mai ne'e:

- Xefe suku Maquili, iha intervensaun fó sai katak em jeral vida moris populasaun iha suku Maquili hanesan 70% depende ba atividade agrikultura no 30% depende ba atividade peskas. Maibe atividade agrikultura hare ba iha resultadu, kuandu resultadu menus ba hotu iha atividade peskas.

KOMISAUN EKONOMIA NO DEZENVOLVIMENTU

Preokupasaun ensensial iha suku Maquili mak infraestruturas básicas hanesan estrada, eletrisidade no be'e mos. Estrada ne'ebe agora dadauk iha desde tempu indonezia nian no iha tempu uku nan seidauk halo rehabilitasaun ruma. Eletrisidade laiha, iha apoiu solar panel maibe at hotu, tanba laiha manutensaun ho nune'e impaktu ba komunidade la asesu ba informasaun. Be'e mos iha be'e matan rua mak responde ba populasaun hamutuk 2,489 pessoas, maibe ho bailoron naruk halo be'e menus fó impaktu mos ba aniaml ne'ebe komunidade sira hakiak hanesan bibi mate hotu, tan ne'e presiza konstrusaun baragem ruma hodi bele kapta no rai be'e atu nune'e iha bailoron naruk hanesan ne'e bele fornese be'e ba animál sira.

Atividade ekonomia hanesan iha grupu industria sira ne'ebe iha hanesan carpintaria, artejenatu no homan, maibe atu asesu ba merkadu mak susar liu tanba kondisaun estrada.

Proposta apoiu ne'ebe hato'o ba iha SEFOPE, ninia kriteira ne'ebe aplika mak difisil liu ba komunidade sira atu passa, por exemplu proposta kona ba apoiu material peskas tenki iha sertifikadu, ida ne'e mak difikulta tebes komunidade sira atu hetan apoiu husi SEFOPE.

Pedidu husu atu fó kapasitasaun ba peskador sira, atu oinsa mak bele halo atividade peska ba to'o iha tasi klean.

- Xefe aldeia 01 Maulaco, hato'o preokupasaun liga ho saúde, liu-liu ema moras todan kareta ambulansia la to'o iha fatin hodi tula moras hodi lori ba iha postu saúde Atauro, razaun dehan tanba kondisaun estrada mak la permite, ho nune'e dala barak ona mak moras todan sira família hulan deit hodi lori ba postu saúde.
- Xefe aldeia Fatulelan, hato'o preokupasaun kona ba kondisaun estrada husi suku ba postu administrativu at liu, tan ne'e husu IGE ninia equipamenstos sira ne'ebe destakadu ona iha ne'e labele retira fali sebele mantein hodi atende estrada sira husi postu ba suku no aldeia sira.
- Ex xefe aldeia, senhor Antero Batista, hato'o preokupasaun kona ba terminal/porto paragam permanente iha Dili la iha, liu-liu ro'o ki'ik sira ne'ebe lor-loron halo operasaun ba mai Atauro-Dili-Atauro, nune'e mos la iha haris fatin no sentina ba sira. Preokupasaun seluk mak husu atu tau konsideraun hodi fó rekonesimentu ruma ba ex autoridade lokal sira, liu-liu hanesan xefe aldeia no xefe suku ne'ebe eleitu husi povu.

KOMISAUN EKONOMIA NO DEZENVOLVIMENTU

Alende problema no preokupasaun ne’ebé koloka husi autoridade lokal sira, iha mos preokupasaun balun ne’ebé mak hato’o husi komunidade sira hanesan tuir mai ne’e:

- Senhor José Pina Araujo Soares hato’o nia preokupasaun, liu-liu lamenta ho servisu IGE (Instituto de Gestão dos Equipamentos) ne’ebé mak iha tinan 2015 marka presenza iha suku Maquili dehan atu loke no hadia estrada husi postu ba to’o suku, maibe realidade la konklui tuir promesa ne’ebé hato’o, ikus mai IGE husu retira’an hodi ba Dili ho razaun dehan atu ba hamrik mesak nudar instituisaun independente ida, maibe teki-teki rona IGE halo fali servisu iha suku seluk, hanesan Maquili oan sente laran moras tebes, tanba sa mak la mai konklui tiha hafoin mak bele ba fali suku seluk. Maibe resposta ne’ebé IGE fó mak hanesan ne’e “Ema ne’ebé uluk sei ikus fali no ema ne’ebé ikus sei uluk fali”. Tanba ne’e komunidade nafatin ejize atu IGE ba konklui tiha estrada ne’e tuir promesa ne’ebé fó sai ona. Kona ba eletrisidade iha ona ai rin sira ne’ebé mak koloka ona iha neba maibe to’o agora seidauk realiza.
- Senhor Izaias da Costa hato’o preokupasaun, liu-liu asuntu saúde ne’ebé liga ho bolsu estudu ba timoroan sira ne’ebé governu gasta osan hodi ba hasai kursu iha NASAUN estranjeiru sira hanesan mediku sira, maibe hotu tiha fila mai governu la uza sira no husik hela sira sai desempregu, maibe bainhira governu presiza sira tenki tuir fali teste no depois teste liu mak bele servisu, no la liu labele servisu. Ida ne’e tuir lolos la bele akontese hanesan ne’e, tanba governu gasta ona osan barak ba sira hodi ba estudu no termina ona sira nia estudu fila mai kumpri sira nia never hodi ba serve povu, liu-liu pasiente sira iha fatin ne’ebé deit mak koloka sira ba.
- Senhor Fernando Cabeças nudar autoridade Igreja Católica, lamenta tebes ho projetu sira ne’ebé implementa iha suku Maquili konsidera hanesan projetu restu deit, liu-liu estrada ne’ebé halo la hotu desde 2015 to’o agora no eletrisidade ne’ebé mobiliza ona ain rin sira ba iha terenu to’o agora la implementa, tuir informasaun dehan la iha kontratu. Ida ne’e hanesan mai bosok povu no husu labele bosok tan no povu ida ne’e, mesmu sedu ka tarde buat ne’ebé hahú ona husu tenki kontinua to’o nia rohan. Kona ba subsidiu ba terceira idade, ida ne’e mos sai hanesan problema ne’ebé mak katuas no ferik sira hasoru to’o ona tempu ne’ebé mak sira atu ba simu sira nia diretu ho lao ain husi sira nia hela fatin ba to’o postu administrativu ho distânsia ne’ebé dok, tan ne’e husu sebele lori ba selu iha fatin deit ou fatin ne’ebé mak identifikasiadu besik liu. Ikus liu kona ba edukasaun, ne’ebé mak atu loke tan eskola paralelo ida hodi tinan oin mai loke ona setimo ano,

KOMISAUN EKONOMIA NO DEZENVOLVIMENTU

tan ne'e husu atu konstrui moru haleu hodi bele asegura no proteje ba fatin eskola ho estudante sira iha tempu aprendijazem.



Enkontru ho autoridade lokal no komunidade sira iha sede suku Maquili

2.4. Enkontru ho autoridade lokal no komunidade sira iha suku Beloi

Problema no preokupasaun ne'ebe hato'o husi autoridade lokal no komunidade sira iha sorumutu ho komisaun D, iha loron 12 dezembru 2019, iha sede suku Beloi hanesan tuir mai ne'e:

- Xefe suku Beloi fo sai katak, suku Beloi kompostu husi aldeia hât hanesan aldeia Usubemasu, aldeia Maker, aldeia Arlo no aldeia Adara. Total populasaun iha 1,738 mai husi mane 854 no feto 884 no xefe família hamutuk 425. Geografikamente suku Beloi nia luan no naruk 56 km kuadradu, hare husi parte costa sul baliza ho ilha Liran, husi norte baliza ho ilha Alor, husi oeste baliza ho suku Macadade, suku Maquili no suku villa Maumeta no parte Leste baliza ho suku Biquili.

Preokupasaun ne'ebe xefe suku refere, liu-liu infraestruturas básicas hanesan estrada ne'ebe kondisaun at liu, no iha aldeia balun laiha estrada hodi sai obstakulu ba komunidade sira atu lori sira produtus ba merkadu. Be'e mos kanaliza husi be'e matan ida naran Berau, maibe bailoron naruk debit be'e menus no labele fornese to'o iha Beloi. Asuntu ida ne'e resolve ona balun husi organizasaun internasional CVTL hodi bor be'e iha aldeia balun no aldeia sira seluk sei nafatin halerik hela ba be'e mos. Eletrisidade, ai rin sira ne'ebe existe desde tempu indonezia nian, iha era

KOMISAUN EKONOMIA NO DEZENVOLVIMENTU

ukun nan ne'e iha empresariu balun ne'ebe mobiliza ona ai rin eletrisiade sira ba iha terenu maibe to'o agora la implementa.

Liga ba saúde iha ona postu saúde rua, maibe sei menus medikus hanesan doutor no parteira, iha ona doutor ida ema Beloi oan ne'ebe ba hasai kursu iha Cuba no agora dadaun nia mesak deit mak fo atendementu ba postu saúde rua. Iha Atauro oan balun ne'ebe hasai kursu mediku iha instituisaun privadu sira iha Dili, maibe governu la utiliza no agora sira desempregu hela.

Kona ba aeroporto/kampu aviasaun iha tempu udan sai fali hanesan fatin debu ne'e mos presiza tenki hadia, no husu atu tau moru haleu hodi prevene animal sira labele tama iha kampu aviasaun.

- Xefe aldeia Arlo, hato'o preokupasaun liga ho estrada husi suku ba aldeia la iha no proposta hato'o ona ba Ministériu Obras Públicas maibe seidauk iha resposta. Eletrisidade mos seidauk to'o iha neba. Terceira idade no deficiente balun iha tinan ida ne'e naran la iha tanba saída, maibe iha tinan sira liu ba kotuk iha. Dados kona ba dezastre naturais kada tinan hato'o hela deit maibe to'o agora laiha resposta.
- Xefe aldeia Usubemasu, hato'o katak Atauro nudar ilha ida iha Timor Leste no mos hadulas husi ilha ki'ik sira husi Indonezia nian hanesan Alor, Liran no Wetar ne'ebe mak iha relasaun família diak tebes, tanba sira nia kultura no lian ida deit. Hodi nune'e komunidade husi Atauro ba sosa ikan iha Liran, Alor no Wetar hodi lori mai fan no dala ruma mos komunidade sira husi parte neba mai sosa necessidade básico balun, inklui mai halo tratamentu saúde iha ne'e.
- Delegado suku Beloi hato'o nia preokupasaun, liu-liu liga ho tempu bailoron naruk hanesan agora dadaun ne'e fo impaktu ba iha batar sira ne'ebe kuda ona sai dodok hotu. Tuir planu governu nian dehan atu halo uma lima ba ema kbi'it laek sira iha kada suku, maibe suku Beloi desde ukun nan to'o agora seidauk halo.

KOMISAUN EKONOMIA NO DEZENVOLVIMENTU

- Senhor Cleopas Tome hanesan komunidade, hato'o preokupasaun liga ba iha uma baraka sira ne'ebe halo iha tasi ibun merkadu Beloi, ne'ebe mak kondisaun at liu halo vendedor sira fa'an produtu sira iha liur deit, tan ne'e husu atu komunika ba ministériu relevante hodi bele tau konsiderasaun. Professor sira barak mak kontratadu tinan barak ona no bainhira los mak sira ba permanente. Husu atu tau membru saneamentu iha Atauro hodi rekolha lixo, tanba iha tasi ibun sira ne'e nakonu ho lixo. Bolsa de mãe, iha tinan ne'e balun hetan no balun la hetan, maibe iha tinan sira liu ba kotuk hetan hotu, nune'e mos hanesan iha família ida mak oan hat, ida deit mak iha diretu hodi hetan subsidiu bolsa de mãe.



Enkontru ho autoridade lokal no komunidade sira iha sede suku Beloi

2.5. Enkontru ho autoridade lokal no komunidade sira iha suku Biqueli

Problema no preokupasaun ne'ebe hato'o husi autoridade lokal no komunidade sira iha sorumutu ho komisaun D, iha loron 13 dezembru 2019, iha sede suku Biqueli hanesan tuir mai ne'e:

- Xefe suku apresenta katak suku Biqueli administrativamente kompostu husi aldeia hát hanesan aldeia Iliknamo, aldeia Ilidua, aldeia Pala no aldeia Uaruana. Husi aldeia hát ne'e aldeia tolu mak iha parte norte no aldeia ida iha parte sul. Total populasaun 2,147 no total xefe família 691.

Problema esensial iha suku Biquili mak be'e mos kuaze aldeia hotu, hanesan iha aldeia villa ne'e totalmente konsumu be'e perfurasaun ne'ebe fura husi empresa lokal sira hodi fornece gratuita ba komunidade sira hodi konsumu. Aldeia Iliknamo ne'e konsumu be'e husi be'e mata Berau, maibe

KOMISAUN EKONOMIA NO DEZENVOLVIMENTU

tama iha tempu bailoron naruk difisil tebes ba komunidade sira atu konsumu. Aldeia Uaruana ne'e konsumu be'e husi udan ben. Estrada iha Biquili hela deit kampu ida mak seidauk to'o ba no bainhira atu transporta moras ruma ka inan isin rua ba postu saúde tenki liu husi tasi ho ro'o, maibe bainhira tasi normal hela maibe tasi kuandu bo'ot labele liu no família sira hulan deit ho distansia ne'ebe dok hafoin to'o iha estrada hodi tula ba ambulansia. Eletrisidade asesu ona ba aldeia rua, hela aldeia rua mak seidauk.

Preokupasaun seluk ne'ebe xefe suku koloka, liga ba iha asuntu edukasaun, saúde, rede komunikasaun no peskas.

Asuntu edeukasaun, iha ona ensinu primária no ensinu básico central, ensino secundaria mak seidauk iha, entaun estudante sira ba kontinua estudu iha suku villa Maumeta ne'ebe mak ho distansia 14 km, nune'e lor-loron estudante sira tenki selu kareta ho dolar ida hodi ba-mai. Tan ne'e husu atu loke deit klase paralelo balun iha deit suku hodi bele redus oitoan gastus ne'ebe mak inan no aman lor-loron hasai ba oan sira.

Asuntu saúde, iha postu saúde ida no iha medikus hanesan parteira ida no doutor ida ema Atauro oan, maibe seidauk iha residensia permanente ba sira hodi hela besik postu saúde no horario atendementu ba pasiente sira hahú 8h00 to'o deit 14h00, depois ida ne'e sira fila ona ba uma no kuandu iha emergéncia ruma mak kontaktu fali sira mai hodi halo atendementu. Hanesan autoridade lokal lamenta tebes ho horario servisu nian ne'ebe mak implementa rasik hodi viola fali regra normal servisu nian hanesan tama 8h00 to'o 12h00 deskansa no tama fali 14h00 to'o 17h30.

Asuntu komunikasaun, iha aldeia rua mak seidauk asesu ba rede telemor no timor telekom.

Ikus liu kona ba peskas, ne'e maioria komunidade mak nia vida moris ne'e hanesan peskador kuaze kobre iha fatin sira hotu hanesan Tibar, Hera no mos iha capital Dili. Balun mos ba peska to'o iha parte Indonezia nian hanesan Liran, Wetar no Alor. Tan ne'e husu ba governu atu apoiu ro'o ne'ebe mak ho sistema modernu oitoan no hodi kapasita sira atu bele peska ba to'o iha tasi klean, tanba durante ne'e sira halo atividade peska iha deit tasi ninin, tanba kondisaun ro'o ne'ebe sira uza la merese atu halo peska ba iha tasi klean.

KOMISAUN EKONOMIA NO DEZENVOLVIMENTU

- Xefe aldeia Iliknamo, preokupasaun ne'ebe hato'o mak be'e mos, iha fatin rua mak seidauk asesu ba be'e mos, no be'e ne'ebe mak sira konsumu lor-loron durante ne'e sira ba kuru ho distansia ne'ebe dok liu no iha tempu udan sira konsumu uda ben. Edukasaun iha eskola infantil ida maibe kondisaun eskola mak at ona.
- Reprezentante xefe aldeia Pala, hoto'o kona ba kondisaun uma baraka iha merkadu tasi ibun Pala, ne'ebe at los no halo fa'an nain sira labele fa'an sira nia produtu. Fini batar ne'ebe distribui husi MAP no fahe ba agrikultor sira la to'o.
- Reprezentante xefe aldeia Ilidua, haktuir katak husi aldeia Ilidua iha kampun ida mak seidauk asesu ba estrada, eletrisidade no rede telekomuniksaun.

Alende problema no preokupasaun ne'ebe koloka husi autoridade lokal sira, iha mos preokupasaun balun ne'ebe mak hato'o husi komunidade sira hanesan tuir mai ne'e:

- Senhor Salomão, hato'o katak presenza IGE iha ne'e diak maibe equipamentos mak la suficiente hodi nune'e IGE labele halo servisu diak liu tan. Atividade peska ne'ebe mak durante ne'e lao sei tradisional hela, tuir lolos governu tau ona sistema formasaun ba peskador sira ho sistema modernu oitoan hodi peska ba to'o iha tasi klean, tanba iha neba mak iha ikan barak. Professor voluntariu balun foin mak hahú servisu maibe assina ona kontratu ba permanente no balun ne'ebe kontratadu kleur ona maibe ate a data seidauk permanente.
- Senhor Bonifacio hato'o katak, estatutu Atauro ne'e to'o agora deit mos seidauk klaru no bainhira mak bele iha. Atauro oan barak mak termina ona estudu maibe laiha kampu servisu. Funsinariu sira ne'ebe tama ona idade reforma tenki reforma ona hodi fó fatin ba fali sira seluk. Atividade peska ne'ebe akontese iha tinan 2015 ou 2016, peskador Biquili oan sira ba peska to'o Lore-Lautem hetan kapturasau hodi bandu labele halo peska ba to'o iha neba. Situassaun ida ne'e halo peskador sira lamenta tebes hodi hatete katak iha tempu ukun nan ne'e limite fali sirkulasaun atividade peska iha territoriu Timor Leste.
- Senhor Lorenço da Costa nudar professor, hato'o katak iha ona lei ruma mak regula kona ba funzionariu nia oan laiha diretu atu hetan bolsa de māe, ne'e kuandu hetan ona abonos família, maibe to'o agora seidauk, tan ne'e mak funzionariu nian oan mos iha diretu atu hetan bolsa de māe. Livru aprendijazem ne'ebe distribui husi edukasaun ba Escola Ensino Básico Biqueli la suficiente, tanba numeru estundante barak liu no livru ne'e la dun iha kualidade, liu-liu kapa livru

KOMISAUN EKONOMIA NO DEZENVOLVIMENTU

nian. Mobilhiarios hanesan mesa no kadeira ba eskola ne'e desde ukun na'an to'o agora la hetan no professor sira hola iniciativa rasik hodi hadia mesa no kadeira sira ne'ebe at hodi estudante sira uza iha prosessu aprendijazem.

- Senhora Elsa husi aldeia Iliknamo, hela iha kampun Iliana hato'o preokupasaun kona ba be'e mos ne'ebe mak kanaliza ba sira nia hela fatin husi kampun Arlo nian, maibe agora ne'e dadaun tama ona ba iha bailoron naruk be'e labele to'o iha neba.
- Representante sociedade civil, senhor Avelino Pereira Fernandes, haktuir katak partisipasaun ministeriu turismu iha dezenvolvimentu turismu iha Atauro kikoan liu, tanba komunidade ho ONG lokal sira ho iniciativa rasik hodi promove dadaun ona kona ba setor turismu no kria tan assosiasaun, maibe ministeriu turismu nia atensaun seidauk maximu. Liga nafatin ba iha setor turismu iha mos presenza husi ajensia internasional hanesan USAID, maibe sira mai halo atividade iha Atauro sira la tau importansia ba komunidade lokal no uza komunidade ba servisu rumu, maibe la konsidera no valoriza komunidade nia partisipasaun.



Enkontru ho autoridade lokal no komunidade sira iha sede suku Biqueli

III. RESPOSTA HUSI KOMISAUN D

Hatan ba preokupasaun no halerik sira husi autoridade lokal no komunidade sira, komisaun D konsidera halerik hirak ne'e pertinente duni. Ida ne'e mak honestidade ita bo'ot sira nian hodi fó sai francamente problema sira ne'ebe infrenta. Problema ensensial liu iha Atauro mak estrada, eletrisidade no be'e mos ne'ebe laos deit akontese iha Atauro, maibe akontese mos iha timor laran

KOMISAUN EKONOMIA NO DEZENVOLVIMENTU

tomak. Ejizensia populasaun nian ne'e tuir lolos fasil ba governu hodi resolve iha tinan sanulu resin walu nia laran, tan ne'e ami nia kna'ar hanesan reprezentante povu mai iha ne'e atu rona no hare direta hodi rekomenda ba governu atu implementa, maibe governu halo ka la halo sira tenki hare ba prioridade ne'ebe iha. Dala ruma ita hanoin katak tenki tau osan barak ba ministeriu ne'ebe importante, maibe labele haluha mos katak ministeriu hotu importante hodi tau osan ba hala'o dezenvolvimentu iha área hotu, tan ne'e mak governu tenki halo equilibrio ba orsamentu hodi koloka ba iha área hotu hodi nune'e bele halo dezenvolvimentu, mesmu ho tempu ne'ebe kliur liu. Mas ba oin governu iha planu ne'ebe diak hodi tau konsiderasaun ba necessidade básico sira hanesan be'e mos, estrada no eletrisidade.

Situasaun sira ne'e, parte komisaun D sei la promete maibe sei lori ba iha reuniaun plenaria hodi hato'o ba iha komisaun especializada permanente sira ne'ebe relevante ba área sira hanesan eletrisidade, estrada, be'e mos, edukasaun, saúde, bolsa de mãe no terceira idade hodi bele tun mai rona no hare rasik ho matan, ou bele komunika direta ba governu atu nune'e bele tau iha konsiderasaun ba iha planu orsamentu.

Tan ne'e objetivu husi presenza komisaun D nian mai iha ne'e hakarak rona barak liu husi ita bo'ot sira atu nune'e hato'o ba iha ministeriu kompetente hodi acelera prosesu, tanba Atauro ne'e bele sai fatin túristiku ne'ebe atrativu liu hodi dada turista sira husi ne'ebe deit, rai liur ka rai laran hodi mai vizita atu bele hatama receita barak ba estadu.

Koalia kona ba estatutu Atauro, parte komisaun D rekongrese katak los duni depois hamosu tiha lei nº 3/2014 hodi kria ZEESM ba Oe-cusse no Atauro, maibe realidade hatudu katak durante tinan lima nia laran implementasaun projetu ZEESM Atauro hela ho naran deit la sente benefisiu ruma, mesmu hanesan ne'e komisaun D encoraja nafatin katak labele laran taridu husi mandato ida ba mandato seluk Atauro ne'e nafatin hetan tratamentu ekonomia espesial. Atu konkretiza mehi sira ne'e depende ba planu no jestaun ne'ebe diak husi jestor ne'ebe kaer ukun, maske la akontese buat ruma iha tinan sira liu ba ne'e, maibe sei akontese iha tinan sira tuir mai, tanba Atauro ne'e konsagra ona iha konstituisaun RDTL. Komisaun D aceita katak depois husi vizita ida ne'e sei kanaliza ba governu central, nune'e mos sei koalia ho Presidente Autoridade foun ba RAEOA no ZEESM atu buka solusaun alternativa oinsa mak bele prepara proposta lei ruma hodi haruka ba Parlamentu Nasional

KOMISAUN EKONOMIA NO DEZENVOLVIMENTU

hodi diskute no aprova ka hanesan decreto governu ne'ebe mak konselhu ministru mak diskute no aprova ou bele hanesan projetu lei ne'ebe mak Parlamentu Nasional mak hamosu hodi diskute no aprova, atu nune'e Atauro bele goja duni nia diretu hanesan mos saida mak akontese iha Oe-cusse durante tinan lima nia laran.

Iha parte seluk, komisaun D louva povu Atauro hare husi parte kultura pasiensia no unidade metin no buras liu tan mesmu partidu ketak-ketak, tan ne'e husu atu preserva no kaer metin kultura ida ne'e hodi lao nafatin ba oin, tanba ho nune'e mak sei atrai ema barak mai vizita liu tan, no husi ukun ida ba ukun ida Atauro ne'e hetan tratamento espesial nafatin tanba konsagra ona iha konstituisaun RDTL.

IV. VIZITA TERENU

4.1. Vizita Grupu Indústria Boneka Atauro

Grupu ne'e hari'i iha tinan 2006, ho membru ema nain 6 ne'ebe hetan apoiu fundu ho montante \$6.300 dolares amerikanu, husi Padre Luis husi nasau Suiza. Atividade ne'ebe hala'o mak produs boneka, pasta, karteira no seluk tan. Husi industria ne'e fo servisu ba timoroan hamutuk ema nain 63. Alende produs, fo mos treinamentu ba inan feto sira kada fulan tolu.

Difikuldade ne'ebe infrenta mak la iha fatin permanente, tanba fatin ne'ebe sira uza ne'e patrimónia estadu ne'ebe governu atu hasai ona sira husi fatin refere hodi hari'i armajen.

KOMISAUN EKONOMIA NO DEZENVOLVIMENTU



Delegasaun visita grupu industria boneca Atauro, iha suku Maumeta villa

4.2. Vizita Grupu Indústria BIO-JOIAS

Grupu ne'e hari'i iha tinan 2006. Inisiu hari'i ne'e ho membru nain 50. Atividade ne'ebe hala'o mak produs pasta, karteira no produtu seluk tan. Rezultadu produsaun fan iha fatin deit no iha loron bazar mak lori ba fan iha merkadu Beloi. Receita ne'ebe hetan husi produtu sira ne'e depende ba vizitante sira ne'ebe mai vizita Atauro.

Difikuldade ne'ebe infrenta mak seidauk iha fatin próprio, tanba fatin ne'ebe utiliza ba ne'e propriadade estadu nian, alende fatin, be'e mos sai dificuldade ba sira.



Delegasaun visita grupu industria Bio-Joias iha suku Maumeta villa

KOMISAUN EKONOMIA NO DEZENVOLVIMENTU

4.3. Vizita Be' e Matan Bitau

Delegasaun ba vizita be' e matan Bitau. Tuir informasaun ne'ebe hato'o husi komunidade no autoridade lokal sira iha fatin refere katak, husi be' e matan ne'e mak fornese be' e ba populasaun iha aldeia Ilitimur husi suku Macadade, maibe tuir observasaun delegasaun nian los duni devit be' e ne'e menus iha tempu bailoron no iha bailoron naruk hanesan foin liu ba ne'e halo devit be' e ne'e menus liu no komunidade sira ba kuru obrigado tenki toba hein kalan tomak.



Delegasaun vizita be' e matan Bitau, iha aldeia Ilitimur, suku Macadade

V. KONKLUZAUN NO REKOMENDASAUN

5.1. Konkluzaun

- a) Kondisaun estrada em jeral iha postu administrativu Atauro hahu kendas husi postu villa ba to'o iha suku no aldeia kondisaun at liu;
- b) Eletrisidade iha postu administrativu Atauro iha suku rua mak seidauk asesu total hanesan suku Macadade no suku Maquili;
- c) Be' e mos iha postu administrativu Atauro maioria la iha, liu-liu iha tempu bailoron naruk ne'ebe mak halo komunidade sira lao ain ho distânsia ne'ebe dok hodi ba kuru no iha tempu udan komunidade barak mak sei utiliza udan-ben ba konsumu lor-loron;

KOMISAUN EKONOMIA NO DEZENVOLVIMENTU

- d) Estatutu Atauro, depois hamosu tiha lei nº 3/2014 hodi cria ZEESM ba Oe-Cusse no Atauro, maibe realidade hatudu katak durante tinan lima nia laran implementasaun projetu ZEESM Atauro hela ho naran deit la sente benefisiu ruma;
- e) Komunidade sira lamenta tebes ho servisu IGE (Instituto de Gestão dos Equipamentos) ne'ebé mak iha tinan 2015 promete ona atu loke no hadia estrada husi postu administrativu ba to'o suku Maquili, maibe realidade la konklui no husik abandonadu;
- f) Komunidade no Autoridade lokal sira lamenta ho sistema BNCTL, liu-liu pagamento ba idozu sira ne'ebé mak centraliza deit iha postu administrativu no halo idozu sira lao ain ho distânsia ne'ebé dok;
- g) Autoridade lokal no komunidade suku Biqueli lamenta ho horário atendimento husi doutor no enfermeiru ne'ebé servisu iha postu saúde Biqueli hahú tuku 8h00 to'o deit 14h00, depois ida ne'e sira fila ona ba uma no kuandu iha emergensia ruma mak kontaktu fali sira mai hodi halo atendimento, tuir lolos sira tenki hela permanente iha postu saúde;
- h) Suku Macadade presiza estabelese Ensino Básico Central (EBC) ida tanba distância husi suku ba postu administrativu dok liu;
- i) Ro'o funeral ne'ebé destaka iha Atauro utiliza seidauk to'o tinan maibe kondisaun át ona;
- j) Komunidade Atauro husu atu tau portu permanente ida iha Dili ba deit ro'o ki'ik sira ne'ebé mak lor-loron halo operasaun ba mai Atauro-Dili-Atauro;
- k) Ro'o ne'ebé mak halo operasaun ba mai Dili -Atauro mak ro'o Nakroma no ro'o Susesu ne'ebé semana ida viagem dala rua, iha loron quinta-feira no sábado ne'ebé mak tula vizitante sira ba vizita Atauro, liu husi ne'e mak komunidade sira bele hetan netik buat ruma, liu husi produtu sira ne'ebé fan, maibe wainhira ro'o Nakroma ba halo hela manutensaun hela deit ro'o Susesu mak halo operasaun kada semana dala ida, nune'e fo mos impaktu ba rendimentu ne'ebé mak komunidade sira hetan menus liu;
- l) Komunidade Atauro maioria nia vida moris depende ba iha atividade peskas, maibe saída mak sira infrenta mak equipamentos peskas menus no sei tradisional hela, nune'e labele peska ba to'o iha tasi klean;
- m) Peskador Atauro lamenta tebes ho kriteira ne'ebé implementa husi SEFOPE, liu-liu proposta ne'ebé mak peskador sira hato'o atu husu apoiu ruma, maibe parte SEFOPE la aprova tanba dehan la iha sertifikadu peskas;

KOMISAUN EKONOMIA NO DEZENVOLVIMENTU

- n) Peskador profissional Atauro barak, maibe governu la uza sira hodi fo formasaun ba peskador sira iha munisipiu seluk ne'ebé presiza;
- o) Peskador Atauro sira lamenta tebes, liu-liu limitasaun ba sirkulasaun atividade peskas iha teritoriu Timor Leste;
- p) Atauro iha produtu lokal barak ne'ebé mak produs husi komunidade sira, maibe presiza estabelese sentru exibisaun ruma hodi bele akomoda hotu iha fatin ida deit mak bele fan ba vizitante sira.

5.2. Rekomendasaun

- a) Rekomenda ba governu sentral ba futuru atu hare oinsa mak difini kona ba estatutu Atauro, tanba Atauro agora dadaun ne'e hare husi parte administrativamente sei submete hela ba iha munisipiu Dili no ekonomikamente submete ba ZEESM;
- b) Rekomenda ba Ministeriu Agrikultura no Peskas atu apoiu material peskas ne'ebé modernu ba peskador sira iha Atauro, inklui fo formasaun ba sira hodi nune'e sira bele halo atividade peskas ba to'o iha tasi klean;
- c) Rekomenda ba Ministeriu Agrikultura no Peskas atu tau iha planu asaun anual hodi rekruta peskador profissional sira husi Atauro hodi fo formasaun ba peskador sira husi munisipiu seluk ne'ebé presiza;
- d) Rekomenda ba ministeriu relevante sira, atu autoriza peskador Atauro hodi livre hala'o atividade peska iha teritoriu Timor Leste, tanba bazeia ba experiensia iha tinan 2015/2016 peskador Atauro sira peska ba to'o iha Lore-Lautem hetan prende husi peskador sira iha fatin refere;
- e) Rekomenda ba SEFOPE atu hadia kriteira simu proposta, liu-liu proposta husi peskador sira ne'ebé profissional ona iha atividade peskas, maibe parte SEFOPE atu aprova tenki iha sertifikadu.
- f) Rekomenda ba Prezidente ZEESM, atu tau iha planu orsamentu ba iha infraestrutura básicas hanesan estrada ne'ebé mak hahu kedes husi postu administrativu ba to'o suku no aldeia sira kondisaun grave liu, nune'e mos eletrisidade no be'e mos komunidade hotu seidauk asesu;

KOMISAUN EKONOMIA NO DEZENVOLVIMENTU

- g) Rekomenda ba BNCTL atu hadia sistema pagamentu ba idozu sira ne'ebé mak labele sentraliza deit iha postu administrativu, maibe husu atu lori ba selu iha fatin ruma ne'ebé besik, tanba idozu sira ne'e barak mak lao ain ho distansia dok no kondisaun física sira nian la permite;
- h) Rekomenda ba Ministeriu Saúde hodi orienta ba doutor no enfermeiru ne'ebé servisu iha sentru saúde Biqueli hodi servisu tuir orariu normal ne'ebé iha, nune'e mos husu atu prepara kondisaun sira hotu ho diak hodi nune'e sira bele hela permanente iha neba hodi atende pasiente sira ho lais;
- i) Rekomenda ba Ministeriu Edukasaun, Juventude no Desportu hodi estabelese Ensino Básico Central (EBC) ida iha suku Macadade, tanba hare husi distansia ba postu villa Atauro dok liu;
- j) Rekomenda ba Ministeriu Solidaridade Sosial no Inkluzau hodi resolve ro'o funeral ne'ebé mak durante ne'e sei at;
- k) Rekomendasaun ba Ministeriu Obras Públikas atu oriente ba IGE hodi aloka nia equipamento sira ba terenu hodi atende emegencia ba estrada sira ne'ebé mak kondisaun at liu;
- l) Rekomenda ba Ministeriu Obras Públikas ba futuru tau iha planu asaun anual hodi konstrui portu permanente ida ba ro'o ki'ik sira ne'ebé mak lor-loron halo operasaun ba mai Atauro-Dili-Atauro;
- m) Rekomenda ba Ministeriu Transporte no Telekomunikasaun ba futuru buka resolve oinsa mak bele koloka ro'o ruma hodi halo operasaun permanente entre Dili-Atauro-Dili, liu husi ne'e mak komunidade sira bele hetan netik buat ruma husi produtu ne'ebé sira produs no fan.

VI. APROVASAUN

Relatório ne'e, hetan ona aprovasaun liu husi reuniaun ordinariu komisaun nian ne'ebé realiza iha loron quarta-feira, 12 fevereiru 2020, tuku 10h00, Oras Timor Lorosa'e, iha sala komisaun D Parlamentu Nasional. Prosesu aprovasaun hetan partisipasaun husi membrus komisaun nain 8 ho rezultadu aprovasaun a favor 8 kontra 0 no abstensaun 0. Ho nune'e relatoriu fiskalizasaun ba Postu Administrativu Atauro aprovadu ho unanimidade.



KOMISAUN EKONOMIA NO DEZENVOLVIMENTU

VII. LIAN IKUS

Ida ne'e mak relatório vizita fiskalizasaun Komisaun Ekonomia no Dezenvolvimentu iha Postu Administrativu Atauro no husu autoridade kompetente atu konsidera relatório ne'e.
Obrigadu.

Prezidente Komisaun,

Relatora,

Deputada Virgínia Ana Belo

Deputada Olinda Guterres